

三
松
堂
集

三松堂集卷二

始辛卯春
至甲午春

吳縣潘奕雋榕皋

休沐

休沐謝人事蕭然竟日閒六街塵似海丈室靜於山花
氣疎簾裏禽聲叢樹間羊求應見過庭草不須刪

斷鍼吟爲李進士

道南

母夫人作

鐵花繡澀含幽光斷鍼滿篋如麥芒鍼頭模糊餘血淚
李君捧篋詞悽愴憶昔太君貞苦節以指餬口口不給
欲將教子答亡人鍼斷指酸心百折殘燈破屋夜漫漫
刀尺無聲敝帳寒一鍼已斷一鍼續寸心知有千鍼攢

平原楓樹今蕭瑟罔極恩深報不得撫鍼空有淚沈瀾
猶記當年穿一一畫荻歐陽事苦辛斷杼孟母垂千春
撫孤能食貴能教大孝揚親在立身從來母貴皆以子
有子而今母不死知君母教未敢忘母名歐孟齊芳矣
卽事

樹影無聲花影移閉門人靜晝簾垂午窗睡醒無餘事
鬪罷新茶賦小詩

雨餘梧館綠陰遮錦石苔紋一逕斜何處清香偏入夢
階蘭新茁一枝花

秋懷二首

徂歲別吳關周紀滯燕域商飈落庭槐碧草淒無色客
久驚時馳齒增嗟景亟居難薪米貴念蹙屨岵陟淹留
亦何爲路遙悲短翼

少小秉微尙虛寂棲山岑弱植依金門旅夢仍江潯況
茲撓沉疴就列力不任嬾因賤成習貧與病相尋逝將
脫塵鞅息筋偃舊林傍巖藝菽麥臨水養魚禽仰事足
承志俯育無悶心豈徒暫閒適永焉娛冲襟

喜汪竹香至京

臘殘喜爾發江東

竺香辛卯
未赴公車

屈指新年笑語同把袂忽

驚春欲老開尊莫放酒頻空看來眉宇黃成采誦得詩

篇氣似虹待埽千軍標奪錦準排金帖付南鴻

春日偕蓬心前輩郭外看花

雨後山容分外新
車輕沙軟不飛塵
同來仙吏真狂士
載得名花似美人
老圃有情還約我
冷官無事但尋春
夜闌酒罷頻看影
舉燭循牆不計巡

題寒燈夜雨圖寄畏堂

颯沓空階落葉深
一燈夜雨坐沉吟
卯君歸去秋看老
飄忽年華負素心

羅雨峰將歸邗江出歸帆圖索題集杜二首

送遠從此別
天寒鷓鴣呼幾時
杯重把
永夜月同孤
江

水流城郭雲山湧座隅輕帆好去便日暮且踟躕
看畫曾饑渴斯人尙典型交新徒有喜醉舞爲誰醒荻
岸如秋水孤槎自客星北風黃葉下高臥想儀形

寄畏堂

判袂驚心花滿枝索居到眼雪平墀奔輪光景知同慨
閉戶工夫貴自持玉柱金庭君臥穩青鞵布韞我歸遲
一官漫說藏身好回首江湖奈土思

寄雲浦

驛亭猶憶惜分攜秋蟀春鷗客久稽不武漫憐譏似蝨
斯饑還忍刺維鵜閒身木鴈吾能置榮願苓通子肯齊

青壁茅齋歸可結，抽帆同過太湖西。

花窖和莊羹堂侍讀

掘地深名窖，開花徧近窗。春猶元帝閉，陰已祝融降。不待風番半，甯勞雨手雙。何當移壑谷，相與倒深缸。

乳酪和羹堂

誰信南來客，能諳北饌佳。莼絲吾自愛，酥味爾偏諧。用潤飛龍骨，能添似火懷。十方曾取供，況我是心齋。

送汪杏江孝廉迴避南歸卽次留別原韻

家世清華重，日邊風流文采壓。時賢驅車未爲知音少，促席還欣樂事偏。蓮漏頻移人軟語，燭花無燄月侵筵。

趨庭後會知非遠
記取鴻飛白露天

元旦和胡竹巖

四載因循浮宦海
三旬荏苒感年華
識塗加齒終慚馬
返哺棲林真愧鴉
縱飲但拌傾柏子
揮毫還擬試薑芽
良辰只願愁端遠
振觸新詩苦憶家

去歲獨余懷故里
今年與子共京華
交情自昔原如水
客鬢相看還似鴉
晴日烘窗舒凍蕊
白雲滿盃試春芽
舊時元日吾鄉好
兩姓朱陳似一家

胡與余有姻婭之誼

元旦和韻

歲改寒威敢顏衰
壯志非中年時序
迅樂事旅人稀
花

氣薰松酌天光照草扉晴窗閒試筆野馬未停飛

上元後一日雪和張方壺

火樹夜騰燄雪花晨點闌天街消宿霧梁苑有餘寒僵
臥吟方苦聽歌興已殘祇應讓平子白戰霸騷壇

方壺疊前韻約爲詩社次韻答之

休沐君無事聯吟情未闌苦甯防杜瘦豪本異郊寒點
筆春雲藹高歌簷雨殘非才甘退舍定霸看登壇

火判和孔莊谷農部

通衢暫據意偏揚土偶何權燄儘長自是眾情趨熱惱
斷無仙骨到清涼燃臍那燭盛衰理冷眼何人聚散場

五蘊六如從爾悟試將究竟問空王

美人風箏和王荊亭

一色明妝下太清相看無語總風情有時天上落餘咳
肯使人間浪識名聲入步虛真縹緲舞能離掌更輕盈
風前不是溫柔侶莫把腰支比燕鶯

兒女喧闐又一時雪膚花貌正參差已空色相超三界
未斷塵緣罣一絲巫女何勞妬容態封姨還與助丰姿
飛騰恐乏神仙骨墮溷生天未敢知

題方壺水滸莊圖

玉堂清夢到滄洲短幅蕭疎寄興幽爲語沙邊舊鷗侶

三才集卷之二
悔將魚袋換羊裘

西龍山下稻花香帶水青羅繞舍長他日扁舟能載酒
收帆早認讀書堂

三年索米逐侏儒松茂泉清願久孤瀟洒吾廬歸未得
也因披卷夢菰蘆

法源寺和汪竺香

撰日來聽煨芋談暮春正好月初三題詩啜茗自多賞
紆玉拖金曾不貪靜識宦途拙似穩嬾諧交味淡偏甘
花宮花事春常好聯袂甯辭次第探

晨入東華門口占

丹甍碧瓦白層層歇馬東華日正升最是天街新霽好
綠陰濃處湧觚棱

王復齋吳文溪張方壺王梅岑王石村胡杏山
邱醒蘭許春巖嚴愛亭集陶然亭送陳雲岡
侍御扈 蹕熱河

帶郭孤亭迥無村野興饒到門雙眼豁繫樹一驄驕雷
奮雲初族杯行暑已消憑軒堪散髮聊欲滌塵囂

急雨過城頭高亭四月秋戰風無定樹赴壑有分流岫
遠濃於黛畦平綠似油眾賓毋促騎吾醉欲淹留

竟日城隅集陰晴變態多斷雲猶帶雨殘照忽明坡扈

輦程非遠當杯顏易酡驪駒且緩唱爲借魯陽戈

喜童枕生朱蕙圃卜鄰之作

人海頻歌偈仄行卜鄰乍喜二難并徑開豈爲東家某
蘭臭誰如同舍生翦燭幾時邀夜飲閉門長日聽書聲
相期拄杖閒乘月禮數從今廢送迎

中書省卽事同龔吟臞孫春臺

鬱蒸何處避三庚紫殿陰陰暑氣清鳥語乍停風乍起
綠槐深處一蟬鳴

送王蓬心前輩佐郡宜昌

莫嘆郎潛過五旬華顛稱作使君身 金鑾初拜 恩

綸寵鶴禁重蒙 睿簡申幾歲掖垣稱後進向來司馬
例詩人放衙燕寢多新咏珍重文鱗寄我頻

中書省爲重養田學士祿題王蓮心畫

江山彷彿記前遊司馬雲煙近罕傳短幅玉堂斜點筆
知君清夢過黃州

秋生蕙圃見和疊韻致答

並舍何妨稱意行寂寥莫恨跡難并火雲已退驕陽斂
碧月初升涼意生有酒盍謀良夜醉卷書真厭苦吟聲
招呼不待長鬚鯉一笑知君跣足迎

太學古槐歌同嚴愛亭馮玉圃張瘦銅賦

太學庭前古槐一傳是元時魯齋先生之手栽皮如青
銅柯如鐵逾五百載不折摧已無清音送竽籟尙餘老
幹撐風雷體堅藜杖比勁瘦質重石鼓同崔嵬偶然種
植有深意想見教育成羣材靈池泮壁幾兵火老幹愛
護侔瓊瑰諸生摩挲向我說越歲辛未抽條枚森然古
本滴古翠色映苒蒨枝添苔

聖朝作人邁棫樸和風化雨翔九垓甄陶不遺寒俊賤
能使生意枯株回直講旣簡明復任四門重見韓公來
古云巨室必大木要在方寸培其莖自當根本服周孔
豈獨文采誇徐崔十年百年語非腐不爾薄植何以承

栽培我衰薇垣旅進退長養竊愧同稗萊辭荒語陋不足記繞樹懷古空徘徊

雨後同王復齋出西直門

雨霽襟已開塵淨眺彌遠小車衝泥行出郭嵐光滿溼翠如招人歸雲意猶嬾幸此蕩羈懷蹇驢未嫌緩

雨窗卽事

夜雨晨未已午來勢轉加硯潮宜墨戲書暗覺簾遮巷
輒聊教靜檐聲未厭譁樵青知我意睡起一甌茶
官閒閉戶早枯坐到深更一枕塵緣斷孤燈客思生鑪薰
衾尚潤夢醒句初成忽憶書堂竹蕭騷入耳清

雨中過雙佩齋與葑亭方壺瘦銅飲

我初訪二張不遇尋王五入門雨美具一笑掌爲拊脫
帽讀新詩颯颯肘生羽是時夏之中震雷翻驟雨注屋
如建瓴礪山欲破柱主人遮留客投轄拌閉戶北釀進
滄溟南烹薦炙脯初筵便舉觥半席更我酤方壺蘊藉
士跌宕不踰矩三爵色油油善笑胸無府瘦銅嶽寄人
說詩宗韓杜耳熱衣淋浪高談羞噲伍破愁仗酒兵揮
霍忘賓主令行三五申鋒起縱橫午嗟余量三蕉壁觀
甘不武譎哂酈說齊辱笑縞穿魯潺潺溜掛簷沉沉寺
撞鼓玉山能不頽天明吾亦賭

立秋前一日集靜春軒以仍呼我輩不羈人分韻得呼字

爽氣先秋到座隅素心折簡共招呼四年舊雨同人海
一葉明朝飄井梧有興釀錢沽注子無心仰屋註潛夫
相期卜夜何須問拌對金波倒百觚

破屋三間任草蕪扣門客到共歌呼張軍未敢談文飲
在谷從教喚酒徒繞徑西風蟲趯趯半階涼月露塗塗
旁人錯擬追風雅潦倒年來一字無

耳熱何妨袒褐呼同心蘭臭喜無殊殘陽退後吟情爽
賸韻拈來好句無脫帽興高吾近肆解頤語妙客甯誣

迎涼後會期頻舉要及征人未首塗

時余將有熱河之行

張方壺扇頭見家蘭垞畫梅因題

玉骨冰肌世外姿寫來便面寄相思孤山春夢渾如舊
風雪推蓬憶一枝

夜雨和方壺

飛瀑懸流掛屋椽壞牆剝土勢疑崩迴風透戶平欺暑
溼氣穿簾故逼燈客況難言家四壁宦情還戀醞三升
白雲木葉千山響對榻年時憶共僧

新詩出力字藏棱直挾簷聲作浪崩虛室電光搜破壁
畫屏人影冷孤燈通衢漲欲迷牛馬一石才甯論斗升

莫怪瓊琚爲報緩對君吾是啞羊僧

將赴熱河七夕瘦銅招餞以織女降臨長命富

貴分韻得富字

平生巖壑心服官身爲囿側聞塞外山末由覩奇秀思
隨豹尾行宿願庶一副駕言趨熱河行衣亦短後車
攻緬雅材羽獵嗤漢陋所慚筆力孱却喜眼力富故人
舊酒徒惜別飲我耐良辰感星河離程數亭堠纖纖月
掛簷獵獵風吹袖後會計非遙無爲勞頸脰

同年席樸園侍讀哀詞

早歲朋交半折摧

今年趙文哲程蔭桂歿于軍張時憲袁果殂于浙

聞君訣去

更銜哀人言雅望留薇省我想清標領柏臺

保舉御史記名以丁

內艱

有弟萊衣憑送老無兒天道信難猜潞河南下波

千里何日生芻糞爾來

王梅岑出示王蓮心所畫茗話山房圖因題並

寄蓮心

露梧煙竹凝秋光高齋清景圖王郎王郎佐郡之宜昌
披圖恍挹鬚眉蒼君言南望路阻長我因讀畫思裏糧
銀瓶側聽松風涼愁心一夜淩瀟湘

清河道中

清谿照影馬蹄疾垂楊夾路蟬聲急客行卓午暑風微

林間蕎麥花如雪

藺溝曉發

破曉晨裝發林間宿鳥飛出門日吐嶺渡水風吹衣陰
谷雲猶滂陽坡露已晞勞生何處息惆悵願猶違

懷柔道中柬寄懷來令皆山族叔

石槽北去是懷柔無數青山翠欲流

聖代和風翔黍谷古時邊徼認檀州溪流泱泱漸車轂
堤柳陰陰擁雉樓最是承平坐嘯好勝他滕薛小諸侯

車中臥行卽景寄瘦銅

褰帷聊仰臥幽賞喜隨車綠樹馬頭合青岑村脚斜趨

程難浪跡卽景已忘家寄語同寮子還疑客語誇

密雲道中

山城當要道景物自清醇豆子多於稻蕎花白似銀清
溪流曲折丹壁障嶙峋形勝無勞說應憐戶口貧

雨後發密雲

輕風吹雨洗塵埃日射崇墉萬象開荒店背城聊一宿
晴郊攬轡喜初來山如屏障濃浮黛水作龍蟠響吼雷
此去塞垣纔百里東門東望氣佳哉

石子嶺山家

茅屋半頽垣人家聚石根山深土自瘠水退壁餘痕老

樹半空腹秋花多掩門無言生計薄耕鑿是

皇恩

石匣營遇雨

雨歇瑤亭子雲開石匣營
巉崖明夕照平磧走泉聲
厲水愁裳溼衝泥怯馬行
誰云行役苦奇景愜平生

白溝澗

明發辭瑤亭峭崖忽當面
連天亘綿延初陽迭隱見
其壁排青松其根走白練
樹色藹森沉灘聲恍迎餞
累累白石寒潺潺跳波濺
逶遲馬不前登頓恣凌眄
境轉豁平沙涉波增餘戀

南天門

巨靈何代擘芙蓉突兀天門積翠濃紫塞北瞻形舞鳳
神區南望氣盤龍岡連磴複紛千狀樹色泉聲過萬
重絕頂招提瞻
睿筆果然仙境有仙蹤

古北口

聖皇德化彌中外天北天南歸覆載重門自壯設險功
防秋不用瓜期代西連山海東居庸古時天險今都會
山莊北望勢如龍六龍歲歲揚旌旆重嵐疊嶂紛
盤紆翠羽金支騰沛艾自從紐幹錫佳名嶺木而今更

罨藹

御製詩註古北口元史名留幹嶺於義無取
接元語色青爲紐幹里留者紐之訛嶺者里之訛

也當作
紐幹里

書生足跡域寰中放眼始知宇宙大自矜飲馬

過長城愧少新詩傳出塞

青石梁

崇岡鬼斧開鳥道懸行徑秋深草半凋左右立頑礪我
來喜晴明緩轡不敢騁歇鞍入僧寮初陽朱戶炯循廊
數塞花面壁啜山茗坐久日頗高佳處要已領亭午解
衣行前登鞍子嶺

黃家營曉行

曉行寒已劇瞶面愛微陽樹影橫平野晨煙蒙半岡陰

崖無日黑塞草未霜黃穫稻村村滿年豐慶白藏

中秋中關對月贈傅春園崇東山兩舍人

誰料中秋月今年並坐看煙凝重岫合星帶拂廬寒音
信人千里關山路幾盤良宵喜無寐情話快團圓

馬化營水漲

前山雨未來冷氣已先至昏黑行危岡路長愁弱騎行
人忽反奔銀濤湧平地奪路登巉崖亂濟甯能次壞橋
漂紅闌衝車沉結駟北方論水利疏鑿良非易連山會
羣流迅發甯能備要當謀良圖誰歟作循吏豈徒爲行
人區區道路計勢息復登途泥滓心逾悸

進哨

一桁紅闌認哨門重岡廻合敞平原甫田雅詠車徒盛
靈囿今看雉兔蕃豐草長林騰萬騎彤弓文馬集諸藩
宸遊嘉頌臣堪第羽獵長楊莫並論

阿圭圖

獸肥草淺馬旣同萬騎蹴踏秋山空削壁秀鋸壓絕澗
矮樹紅翠排危峰平橋流水瀉碧玉著色短幅開王蒙
貪奇愛險忘路遠境轉咫尺迷西東

行廬雜詠

風旗

進哨後營帳各占山岡以布爲旗以識

別色復依岡風飄信短長招人殊酒旆歸興憶帆檣遇
客時先問分張各一方停驂憐視短退食幾回翔

帳房

穹廬如矮屋舒卷妙隨時宛爾千間底何妨一木支打
頭難免慮鑿壁或生疑風雨聊堪憩從心向背宜

戰裙

結束雄心起馳驅合勁裝何能竟投筆便擬賦同裳古

製徵邪幅佳名稱襦褌直思屬橐韃躍馬掃欃槍

時金川未

靖命將軍
等統兵進剿

行牀

行帳攜家具胡牀載寢興自憐渴睡漢不異打包僧請
席先誅草移營更引繩今朝散直早聊欲曲吾肱

賜鹿恭紀

萬幕平沙靜不譁明駝倒載夕陽斜回鑣共仰

天顏喜拜

賜旋驚禮數加

是日內閣六部共

賜一鹿

飽德馳驅慙報拙

奉親歸遺計程賒割鮮野食真豪事泥飲他時田父誇

烏蘭哈達音德密

音德密漢言暫住也

信宿此山岡聊寬襪被忙炊煙沉岫影燈火雜星光月

暗蘆花白風微艾葉香重衾嫌脚冷壓帳有嚴霜

哨中遍地

皆艾清
香撲鼻

夜過全穆堂詹事吳閬仙上舍次日閬仙以詩

見投次韻二首

班荆塞外遇誠奇
夜靜平沙響月題
人耐寒更談娓娓
月當下澣上遲遲
烏桓煙景紫閨夢
鳳闕秋光繫客思
最是白公風調好
撩情還擬買楊枝

清才季重稟由天
劒化龍騰玉有煙
賦奏子虛嗟遇裔
神傷奉倩故情牽

時閬仙有悼亡之痛

呼盧喝雉聊謀樂
急束單

裝亦可憐歸去春
明期作達好將詩
酒餞殘年

齊爾博庫達巴罕

達巴罕漢言嶺也

山行忽無路鳥道懸雲端人馬細如蟻
纍纍中谷攢畏險舍騎行彳亍逾林巒
漸乃躋其顛盪冒得遐觀遙岑擁丫髻
近嶺迴凌湍仄徑臨巉崖萬壑疎林寒
平生好奇心好山思遍看龍門懼陋杜
華頂哭嗤韓到此足力孱悄然愁心肝

卜克達巴罕

一聲咳應萬山聲衝虎穿林客夜行
月黑但愁嶺路險經危却喜此來平

阿木虎郎圖夜有懷畏堂雲浦兩弟

流水聲中掩拂廬風高落木聽蕭疎
故園此夜連床者

小閣燈明正讀書

九日熱河道中有懷郭懷谷陸謹庭默齋昆季
重岡迴抱水淙潺指點行窩翠靄間烏兔無情催客老
輪蹄何意妬人閒聊將薄酒酬佳節漫對叢花憶故山
此際天平秋正好白雲紅樹想同攀

五更入古北口

清輝蕩羣岫古月升山陽客子貪宵征單車冒嚴霜突
兀關門雄綿亘邊垣長夜色靜板屋明燈隱懸岡此地
緬當年嶽峯戰伐場有生幸休和舉趾胥康莊况復忝
朝籍豹尾聯鷺行覽勝愜素懷路遙豈我傷

兩間房直次同唐農部樂宇

穹廬瀑直依平岡雲輕塵淨懸清光松敲別岫寒轉翠
柳搖殘照霜初黃回

鑾正喜秋色好退食却厭沙隄長清談良友久不覺日
落衣薄山風涼

冬至前一日雪後集鶴半巢分韻得班字

上弦月子弓彎彎窮冬雪霽風更頑書雲協律非我事
堦屏垂幕愁難刪舍人校書白虎觀大筆濡染追馬班
才多事繁豐暇豫撰日喚我開心顏初筵促膝膚粟散
改席射覆燈花殘羊羔美酒異奢縱灞橋驢背殊酸寒

金罍玉斝那足算典斟不用雙雲鬢嗟余三蕉稱小戶
醉鄉年來頗往還濡頭但學張旭草韜精常閉劉伶關
自從八月塞外去芳筵塵積清樽乾歸來王郎友又挂
席金陵南望空蒼山今夕方壺胡不樂豈以鐫級被劾
彈人生百年有定分寵辱聚散浮雲閒朝吁暮喈不爲
樂飛騰急景難追攀直須臥甕謝膠擾豈有文飲愁譏
訕二三子者能我伍相與酩酊窮殘年

除夕前二日集邱蘭莊寓分賦盆梅

瘦影曲屏中前邨幾樹同枝卑甯貶格壑短自敲風夢
訝孤山近人疑縞袂逢酒醺開旋旋莫遣座尊空

記得銅坑路千枝復萬枝
籃輿無夢到塵海放船遲
孤館春初動幽姿屈更奇
相看鄉思亂破悶與題詩

西苑下直

襖被衝泥笑我忙
褰帷喜不負春光
微風吹水柳搖綠
晴日蒸崖桃破香
飲澗鐵驪還嘯侶
拍波乳鴨自分行
詩材畫本閒收得
未覺歸時道路長

自題畫

庭花爛漫鳥綿蠻
散直人歸晝掩關
倦眼摩挲無一事
吮毫閒寫過江山

三松堂集卷三

始甲午春
至甲辰夏

吳縣潘奕雋榕皋

公退

公退但焚香身閒愛日長
客因看畫至僕爲借書忙
荷雨飄殘點蘋風送晚涼
掩關塵事絕一枕到羲皇

鷺翎畫應教

偶揮雪繭得霜翎貌取仇池一片青
不用三錢費坡老高齋眞見岳眞形

彭守約松泉卷子

茂松清泉怡我性怪君痼疾同師正
玉璜羊裘分各殊

相君骨相非幼輿，竭來寫圖寄幽懷。展卷已覺生面開，
東畬老筆爲補景。紫稜閃電巖間來，岸敲島側蛟蟠壑。
蒼雲覆地苔花薄，水聲風聲儼清都。想像詩肩松子落，
風流文采近今稀。三年一飛待扇翬，濟川作棟要大木。
豈有至寶淪煙霏，束帶看爾朝天扉。

華石渠秋帆冊子集杜

處處清江帶白蘋，小航恰受兩三人。知君此計成長往，
何用浮名絆此身。
風江颯颯亂帆秋，天人滄浪一釣舟。但使長年飽喫飯，
微軀此外更何求。

遠害朝看麋鹿遊似君須向古人求高車駟馬帶傾覆
余亦沙邊具小舟

回首風塵甘息機重嗟筋力故山違埽除白髮黃精在
老大徒傷未拂衣

春明話雨圖爲陸上舍謹庭題時陸下第南歸
秋雨秋風冷畫屏夜闌軟語一燈青情因久別知逾摯
杯到忘言忽共停此日雪鴻懷往事他時尊酒記寒廳
升沉世態何須慨倦眼頻年實飽經

送雲浦下第南歸

弟勸兄酬慘不歡一聲朔雁到窗寒脂車明發期真果

把盞今宵醉轉難
雨夜對燈憐影獨
湖天欲雪念衣單
到家待葺東頭屋
好譜笙詩繼采蘭

殘月西風瘦馬遲
羈愁鄉夢兩迷離
一名問爾何加損
薄宦嗟余淹歲時
自有萊衣抵畫錦
莫將和淚滴春卮
高堂定問兄顏狀
青鬢應憐有白絲

山塘泛月卷子爲陳上舍鳳儀

紅欄綠浪煙冥濛
金昌亭外風光融
扁舟一棹出闌闔
層巒聳翠當晴空
憶昔鄉園樂事足
青鞵布韞無拘束
挈榼推篷斟酌橋
側羅枝策千人石
樂事昇平難具論
神仙富貴非思存
曲院衣香風淡淡
沱畫船燈爇月黃昏

看披鶴氅來我嬾一官聊漫浪自燒榼
柚煖餘杯

人日馮玉圃招同張瘦銅王秋樵張方壺汪竺

香吳文溪集鶴半巢以人日題詩寄草堂分

韻得堂字

堅冰澤腹披浮陽春風昨日來華堂初正涉七氣弄暖

用韓昌黎詩句

佳節可用古所藏素心折柬一笑集相與促膝

傳壺觴鶴半巢中地十笏好樹遮牖書連牀澆愁忽訝

腸出角飲雋旋見瓶堆牆移時酒酣耳亦熱雜以詼笑

無禁當杯深樂極不知罷新月挂樹光射廊高才不嫌

小詩小多酌忽發狂夫狂人生百年一瞬息俯仰日月

奔輪忙神山仙人號賢聖縷羅道妙聲雷硯口前有句
截不得憑愚護短徒誇張何如一壺擔竹杖樵兄漁弟
同相羊行抽手販買短棹莫待青鬢生元霜靈巖山根
太湖畔此時萬樹梅花香江山空曠人韁鎖夢想去路
終彷徨更闌燈炮客上馬參橫月落天蒼茫

下直閉門

餘寒猶未卸棉衣竹影禽聲伴掩扉想得故園春事好
鶯啼草長正花飛

七夕雨時京兆君下世已三月

黑雲遮斷銀潢路急雨摧殘烏鵲橋好事隔年人杳杳

他生密誓恨迢迢風鳴紙閣燈初暗衣覆熏籠香未消
離合仙凡同一夢漏殘兀坐聽瀟瀟

澹春別墅冊子爲張東畬題卽送之蜀中

偶拋老屋走京師遂綰青綢拜赤墀泉偶出山甯便濁
雲看歸岫莫嫌遲

富貴逍遙未許兼凝香官舍想垂簾夏天脩竹吾廬好
可有清音到黑甜

百花潭水是滄浪喜得佳名似故鄉他日寫圖如見寄
開函還帶浣花香

銜杯落日愴分裾錦瑟年華付索居待爾抽簪賦歸去

冷官也擬問鱸魚

偶畫小幀寄郭匏雅因題

彷彿橋邊繫短舟故山一別六經秋
酒闌燈炧摩雙眼寫與騷人當卧遊

題同年田耕堂

尹衡補讀書圖

我生多好無一成作書作畫疲精神
厭煩年來思面壁省事但願心太平
六經諸史束高閣玉池生水溫而清
丹田未熟書田廢頭上歲月空崢嶸
田郎讀書年四十稽古非羨桓榮榮
東華退食手一卷似珠之貫盆之傾
秋庭老樹倚危石石根立竹青縱橫
命工寫圖有深意

知君嗜古心堅貞少年不力昔所嘆讀畫使我心忤忤
問奇挾策會載酒剝啄莫厭敲門聲

僧鞦菊和朱蔬坪舍人

佳色先秋裊露深疎枝端合傍雙林石牀煙冷無行迹
曲徑泥新有足音漫想白衣來問訊祇應元度許追尋
相看宴坐同懸解却憶西風九鍊金

雨荒深院掩茅庵丈室閒愁了不擔未繞疎籬盈把摘
也開笑口滿頭簪貫休行脚瓶餘一彭澤還家徑啟三
識得瓣香千古意高人彌勒本同龕

觀空結習未全忘淨土花開青色光白足已看歸寶界

芒屨可許傲天霜
趺來瘦影香留徑
脫盡陳根月滿廊
采采餽糧跣可結
西風先到贊公房

重陽未過雨廉纖
悟徹蒲團一笑拈
肯信問名遺舊譜
未妨侔色詠盈襜
錫飛老圃鳬疑化
眼淨空花佛不嫌
鬱鬱試參無上諦
寒泉真擬薦香嚴

宋奕巖舍人餉安肅菜兼示近詩用山谷以雙
井茶送子瞻及謝劉穆父贈扇韻二首

黃昏遣奴問起居
叩門剝啄得報書
傾筐兼餉安肅菜
中有西風白露珠
舍人年來屏鮮腴
故知此味肉不如
底事蓴羹下鹽豉
千里遠憶三泖湖

鳳凰口銜五色紙新詩藻彩實相似速追甫白要至誠
耳食那數明七子青燈明滅哦夜寒知君頗亦懷家山
安得櫻鞵攜竹杖相與吟賞林巒間

雪中蔣椒村孝廉送梅花賦謝

珠幢玉節排衙仗

用東坡雪詩意

雪骨冰肌仙子降叩門驚起

僵卧人一片幽光團紙帳哦詩啜茗相對寒寒香沁腑
我欲仙籃輿却憶銅坑路萬樹春風次第看

棟鄂孺人貞烈詩

大學士舒公
子舒安之室

幽蘭秀空谷芬馥含奇姿淑女生名門婉婉敦柔徽來
嬪君子室比肩亦齊眉父母旣以順宗黨成交推十年

侍晨昏辛苦甯或辭皇穹無私親與善不可知嚴霜萎
靈芝疾風摧連枝人生譬朝露所天悲乖離婦人不撫
孤從死無異詞仰事況有人問心又奚虧畢命乃取義
懸梁非殉私成仁在殺身賢聖垂良規衣冠古所偉巾
幘今如歸卓行動

宸聰金字光門楣豈徒照家乘 國史流清輝

嚴秋萍撫琴圖

礪泉激石風入林幽人林下坐撫琴有琴無絃琴韻足
彷彿雅頌之遺音我昔巖栖習古調多好無成還自笑
悅人況復尙新聲指棘叢生宜坐嘯玉柱金庭路不賒

高山流水認君家刺船但覓移情處莫問成連與伯牙

春日言志

三十偶通籍飭躬企前修七年忝薇垣旅進慚滯留定
省旣無期舉案又喪儔思弟時步月憶子添羈愁因循
歲月徂素餐常內羞坐此但懷歸越吟聲伊憂老親諭
努力未老簪甯抽陳力聖有訓徇祿古所尤行素知良
難退耕不自由是時鄧尉梅香氣滿六浮山光雨橫黛
水色晴拖油安得官滿時桐帽棹櫂頭

寒食前一日西苑道中作

汨汨勞生事悠悠長逝人匏瓜千里客石火百年身淚

滴燕郊土魂傷茂苑春柴門有驥子腸斷此佳辰
去歲尸家祭有齊仗弱軀篋筐猶手飭拜起已人扶江
館虛春薦山花照病夫思君還自念爲爾眼將枯

下直遣悶

閒官如野客鍵戶當歸山花盡蝶亦去春深燕不還掩
書誰與語得句暫開顏擬脫朝衫去低徊自笑孱

出都口占

久病倦於客思親應自歸敢希宏景志庶息漢陰機旅
鴈驚人起孤雲傍岫飛片帆秋色裏直指舊漁磯

入江南境病體漸蘇家人頗有言告歸之非者

詩以曉之

湖平帆滿畫船移
水檻風涼坐詠詩
新月疎鐙憐杜甫
藥鑪經卷伴王維
傳經好坐三間屋
奉鯉應開半畝池
假滿但愁時易改
轉頭還切望雲思

潞河道中寄柬同省諸君子

憶辭鄉國侍鸞闈
旋脫衣冠款板扉
富貴不來甯足慨
頭顱如許正宜歸
課耘準擬尋鄰叟
行藥何妨步近圻
寄語鴛行舊巢侶
錦衣不著著萊衣

簪毫堦藥幾翻紅
病思鄉心逐斷鴻
天祿石渠慚素食
泉清松茂本家風
丹鑪弄火功宜密
青史標名志已

空最是扁舟情味好淡煙濃靄綠楊中

抵家志喜

暫離塵網賦閒居喜侍溫顏見友于燈火劇談聯夜榻
家園周覽奉晨興新圖屏幃青圍座舊種簷蕉綠上裾
一事閒來還快意呼兒檢校滿箱書

用放翁詩句

抵家志感

七年青瑣返柴扉華表重來愴令威松作老鱗鶴韻遠
癸巳冬先大父謝世
手植庭松葱鬱如故竹餘舊蔭履聲稀
甲午春叔父懋修公謝世今年
六月叔父肅
循陔春永情初愜報
國年長願未違最
是望廬銜百感可憐同出不同歸

乙未四月史宜人卒於京邸

吳谷亭幽居卷子

枕簟林間淨幽人逸興饒涼波沉白鳥高樹落鳴蜩嵒
阮甘栖谷巢由不造朝草堂六月裏隱几亦蕭蕭

烏程道中

溪行涂往復小艇與沿洄隱几纔容膝推篷聊引杯石
橋藤蔓裊桑徑豆花開最是溪翁樂門無熱客來
一港船初轉三家別有邨秋風吹果蓏晴日散雞豚背
水柴扉閉隔溪鳥語喧笑他耳食者恂悅說桃源

抵村贈諸親族

余祖籍隸歙縣之大阜村

不到鄉園十二年繞村喬木長風煙親朋無恙驚顏改

閭井依然慨歲遷地瘠莫嫌風俗陋家肥端賴子孫賢
相期彝訓重敦勉共守詩書更力田

示族中學者

十室有忠信誦絃況一村敦龐三古俗涵養

四朝恩莫問由求撰先分舜蹠門欲知吾道樂鼓瑟已
忘言

湯口贈程介山

黃山三十六峯色都在君家庭戶間却羨裹糧人好事
不辭辛苦肯躋攀

殺雞爲黍坐茅堂松影如龍月射廊濟勝爲余呼健步

笑看嵐翠滿衣裳

土人號海馬者健步遇險處能負客行給以青蚨使隨行

祥符寺

古寺名存屋宇崩苔階瓦徑已無僧
禪門小劫猶如此
豈獨人間慨廢興

茅蓬

四山嵐影合一徑寺門深但有竹松色而無鐘磬音
夜寒疑過雨林靜不飛禽三宿淨塵慮窅然生隱心

湯泉

陰陽體相抱離坎氣互通陰火煽寒泉清冷變沖融
誰從深山中洪鑪運神功我來解衣浴時候交初冬金沙

耀的礫石壁流琤淙聲沸試濯足霑灑還沃躬外焉除
垢穢內焉祛昏蒙身輕心以淨庶躡佺喬蹤

慈光寺觀明萬厯年所賜繡旛紫衣鉢杖

紺宇敞山腰禪堂俯碧霄茶瓜留過客衣鉢話前朝
猿立遠峰矗鳥來仙樂飄探幽初放眼登頓敢辭遙

遙山白石

如峯僧曰此白猿也移時失所在有鳥成羣鳴如笙簫山中呼爲音樂鳥

蒲團石

此石號蒲團遊人可小憩何當長跣趺於焉棄身世

宿支殊院

暫憩蒲團石言穿一綫天老僧無可語深院獲安眠
蟾

魄危峯上松聲萬壑傳塵勞能解脫吾意欲栖禪

文殊院晨起看雲海

夜宿萬山中晨起看山色不見山一峯但見雲四塞
山以靜爲德惟雲能動之雲山相鼓盪變幻無恒姿
青山如盤渦奔騰不可制白雲如迴波淪漣渺無際
異境到方知知亦不可說窅然俯仰間雲山看變滅

額日到
者方知

院有

白龍潭

白龍屈曲下林隈隔嶺驚喧十月雷客屐慣從松頂度
僧廬多傍石厂開陽坡樹暖餘紅葉陰壑藤枯長碧苔

我欲披榛尋古蹟暮雲深鎖鍊丹臺

大阜橋小憩

石橋吾再到欲去更遲留川阜瞻縈帶高會緬鈞遊波
明堪鑑影沙淺不勝舟卹得倪迂筆閒將畫本收

大祥後卽事感賦示畏堂雲浦

人事隨年異春光與昔同霏微布穀雨澹蕩落花風慈
竹抽新筍金萱發故叢虛堂陳翼罷哀慕更何窮

去者日已遠時乎不再來導衣宜改色祥祭用除哀敬
設神憑几重陳手澤杯春暉回首渺魂斷白雲堆

安居京兆君子上字圩新阡感賦

二十年前事惘然一聲薤露涕雙懸
早知塵世身如幻最恨浮生夢不全
古渡一棺憐五稔潞河八日記庚年
誅茅架屋工粗就愁看嶮巖起暮煙

題探梅圖爲雲江

四山濛濛香霧溼山南山北花光合
河豚橋外雪初晴著屐尋詩攜野衲
軟紅插脚幾經春流水孤邨夢不真
衝寒羨爾探幽客不數當時驢背人

聞雞

夢醒聞初唱冬釭翳不明問安親
棄養析義學無成寒憶趨朝侶衰闌
待漏情尸鄉尋土室只合老餘生

新製蒲團趺坐竟日頗悟惺惺寂寂之旨因顏

其齋曰惺惺寂寂齋系詩一首

頓覺塵氛遠簾垂虛白生惺惺期見性寂寂已忘情簷
鳥千聲囀鑪煙一縷橫高齋修竹裏穩坐得身輕

錢栩栩道人遺墨爲錢梅溪

千枝花柳萬重煙畫出桃源洞裏天洞口白雲如客嬾
紅塵封斷不知年

底須卻曲怨迷陽身世當年竟兩忘邱麥何人思子國
蒹葭秋水白蒼蒼

殘山剩水比璠瑜水鳥山花憶友于文采諸孫今作手

好將祖德補新圖

松陰小憩圖

桃笙蕉葛劇清涼
石罅松根味儘長
最是竹籬風韻好
半甌花乳泛幽香

一天涼影展蘘荷
別館揮毫興轉多
輪與空山堅坐者
新詩長日對松哦

雪窗卽事

萎盡穠華耳目清
一枝孤幹獨含榮
羣芳自是無貞性
不是冰霜有世情

草長江南鶯亂飛
香車隄上玩芳菲
巡檐今日梅應笑

誰賞孤芳雪未霏

甲辰至京喜晤鮑雅堂同年

八年孤負 帝城春握手相看笑語親
客夢纏綿新舊雨故交珍重兩三人
閒居剩學黃門拙知我誰如鮑叔
眞最是羊曇留百感歸帆亭裏榻凝塵

謂夢堂相國

恭和

御製臨雍禮成遇雪元韻

盛典隆儀紀上丁飛翼接夕未曾停
呈祥預卜盈千畝寫曜先欣映六經
周渥三農占大有精禋一德格維馨
我

皇錫福還施澤霑灑衣裾念在廷

齋中芍藥盛放用東坡玉盤盂韻

掩關掃地愛公餘老去風懷漸欲無
丈室忽成香世界一枝真賞玉盤盂
淺深態學徐熙筆綽約姿宜周昉圖
多謝殷勤伴寥寂綫紅如捻雪如膚

白頭誰與結心知脈脈相看意不疑
爲護生香添活水更施笛簟設雞彝
如君解恨何煩語許我相依合有詩
吟罷高齋還獨賞態濃肌膩一枝枝

畏堂假歸半年以書相訊令余爲決出處詩以
速之

去年芍藥花時聚

畏堂甲辰正月辭家入都
余于閏三月來都相晤

今歲花開

悵獨留晝永羨君衣是錦騎遲憐我土爲牛無田漫說

宜三已問舍何時分兩頭

余與畏堂因老屋不能容兒
子世璜來書謀遷尙無定宅

假滿秋風看轉眼清波可許伴閒鷗

復寄畏堂

人事無涯歲有涯跳丸日月去難遮要知出世原無法
但得安心便是家幾日重聯聽雨榻更思並駕上朝
車旅居慰悶惟詩酒寄與新篇當棣華

芍藥詩成花彌爛漫添插紅紫數種賞玩不足

續賦二章

只有名花不世情肯從羈客吐奇英八姨妝罷不施粉
妃子曉來餘宿醒漫說魏姚矜絕品最慙官職稱佳名
豐臺車馬從如織自淪新泉對爾傾

虛堂疑雨帳疑煙怪底書生得勝緣埽却幾千層俗障
攜來二十四嬋娟朱朱白白紛呈態燕燕鶯鶯各逞妍
莫道生涯此地淡仙姝久已厭腥羶

星橋見和芍藥詩兼以索飲疊韻招之

散直垂簾小雨餘奇葩除却此間無色如仙子藐姑射

香比藕花密鉢盂

江南白荷千
葉名密鉢盂

已約良朋聯舊會待煩

好手補新圖花田正要濃膏灑雲合西山有幾膚

時望
雨孔

殷

握手相看盡故知
埽軒洗盞更奚疑
休論肘後誰懸印
且坐花間共覆彝
可有酒人無好酒
要從詩老賺新詩
從今莫放杯離掌
趁取繁英正滿枝

余賦芍藥詩邀同人共作張嘯崖同年故以綺
語嘲余岑寂因賦二首一以致羨一以解嘲
時嘯崖姬人新自津門至都

欲將心事託雲英
漫續離騷擷杜蘅
爲問多情賦芳草
何如解語對傾城
午窗夢醒微馨散
卯酒潮回淺暈生
國色天香俱入手
莫矜豐艷笑孤清

聲聞上乘理能探臭味還從鼻觀參已分室空無法喜
不妨花散到瞿曇倚崖暖氣吾何有嚼蠟微言子自諳
試向鏡臺觀色相安心彌勒本同龕

題鄧尉探梅圖

光福鎮前雪欲飛上崦下崦風力微幽人討春每獨往
一溪寒碧香霏霏

泰定橋邊放小船曾攜野衲訪癯仙披圖恍踏潭東路
酒冷香清又一年